

# Jalin Kerjasama Dengan Beberapa Agensi Lincoln Corner Resource Bantu Tingkat Pendidikan



Mohamed Aizamuddy menyampaikan hadiah kepada salah seorang pemenang



Pengunjung turut melawat pameran Hari Bumi



Harvinder...Sentiasa bekerjasama

**Oleh MUHAMMAD ZAIDEE DAUT**

**BANDARAYA MELAKA,** 12 April - Lincoln Corner Resource Centre Kedutaan Amerika Syarikat akan terus bekerjasama dengan agensi kerajaan di negeri ini dalam memberikan ilmu pengetahuan kepada rakyat di negara ini terutama dalam bidang pendidikan.

Pustakawan Lincoln Corner Resource Centre, Harvinder Kaur berkata, sehingga kini pihaknya telah bekerjasama dengan beberapa agensi seperti perpustakaan awam di beberapa negeri dan Melaka turut menjadi lokasi pihaknya memberikan perkhidmatan.

Katanya, sejak menempatkan sudut Lincoln Corner beberapa tahun lalu, beberapa program telah dijalankan seperti Tele Sidang video, perkhidmatan perpustakaan

dan aktiviti perpustakaan dengan kerjasama PERPUSTAM.

“Beberapa program yang telah diadakan dengan kerjasama PERPUSTAM dapat memberikan banyak faedah kepada masyarakat di negeri ini terutama kepada penuntut institusi pengajian tinggi (IPT) dalam mendapatkan bahan maklumat pembacaan mengenai Amerika,” katanya.

Harvinder berkata demikian selepas majlis pertandingan mewarna, sesi bercerita dan ceramah “Keusahawanan Belia” di Aeon Jaya Jusco Bandaraya Melaka, di sini kelmarin.

Program anjuran bersama PERPUSTAM dan Lincoln Corner Resource Center itu turut dihadiri Pengarah PERPUSTAM, Mohamed

Aizammuddy Mohamed Idris dan Pegawai PERPUSTAM, Nurul Huda Ibrahim.

Pada majlis itu, seramai 100 kanak-kanak dan murid dari sekolah ini menyertai pertandingan mewarna dan sesi bercerita, di samping menyaksikan pameran Hari Bumi yang disediakan pihak Lincoln Corner Resource Center.

Menurut Harvinder,

program yang berterusan ini akan dijalankan dan terbaru, pihaknya dengan kerjasama PERPUSTAM akan mengadakan Kem Bahasa Inggeris pada akhir Julai ini membabitkan penyertaan seramai 100 pelajar sekolah di negeri ini.

Sementara itu, Mohamed Aizammuddy berkata, PERPUSTAM bersedia bekerjasama dengan pihak Lincoln Corner Resource Center dalam menyalurkan ilmu pendidikan kepada masyarakat di negeri ini.

“Ini adalah satu peluang kepada masyarakat untuk mengetahui maklumat mengenai Amerika Syarikat bukan saja dari aspek ekonomi, malah dalam bidang-bidang sosial dan budaya,” katanya.



Sebahagian kanak-kanak yang menyertai pertandingan mewarna